




Rabu, 19 Juni 2024

Ogen: Matius 19:4



"Si Empuna Kerajaan Surga"



▼ *Erjabab Jesus, "lenga kin iogendu kata si tersurat i bas Pustaka Si Badia, i ja ikataken maka mula-mulana ijadiken si Nepasa sekalak dilaki ras sekalak diberu?".* Teks enda si jadi bahan paksa tenengta wari enda, alu tema si empuna Kinirajan Surga. Sekalak dilaki ras sekalak diberu ijadiken Dibata lako maba kinirajan surga i doni enda. Sekalak dilaki ras sekalak diberu ijadiken Dibata lako ndalanken dahin gelah reh tangkasna kerna sura-sura Dibata nandangi doni enda. Tugas rikut tanggung jabab enda i dalanken gelah Kinirajan Surga reh mbarna. Dahin e i dahiken gelah tangkas teridah kerna Kinirajan Surga. Si empuna Kinirajan Surga e me kalak si maba kejuah-juahen dengen kedamen ku tengah-tengah doni enda. Matius 19:4 e me jabab si ibereken Jesus man penungkenen kalak Parisi si atena ncubai Ia. Kalak Parisi tempa-tempa nungkun kerna undang-undang dengen aturen-aturen agama; tapi arah penungkenenna e atena nidingi Jesus.

Paksa gundari enda pe, melala kegeluhen kalak kristen si pekulah-kulah; tempa-tempa ia nungkun kerna payo entah la kerna pendalanken nandangi aturen-aturen rikutken peraturan si tersurat bas tata gerejanta; tapi arah penungkenenna e atena nidingi serayan Tuhan, gelah di kune salah serayan e njababsa lit dalanna lako mpersalahkensa. Hal enda tentuna labo ngena ate Dibata, erkiteken perbahanen e terjeng ndaram-darami kesalahen kalak. Melala gia kalak kristen paksa gundari si erkiniteken alu pekulah-kulah, selaku Moria kegeluhenta sipakeken lako maba kinirajan Surga ku doni enda. Arah kegeluhenta, perbahanenta, pendahinta bage pe pengerananta itandai dengen ieteh kalak maka kita e me si empuna Kerajaan Surga. Arah kerina dampak geluhta ersaksi kita kerna Kinirajan Surga.

✎ *Teridah maka kita e me si empuna kinirajan surga*